

Naalagaaffiit Peqatigiit Sorsutsaaliuisutut ataatsimiittartuisa aalajangersaaneri malillugit, pinerliiniarnernut aningaasalersuinerit aamma Koreap Avannarliup (DPRK-p) atomimut programmiliaat pillugu inunnut, eqimattakkuutaanut, immikkoortortaqarfinnut aamma sullissivinnut aningaasaqarnermut tunngasut ilaannut killiliisumik iliuuseqarnerit pillugit Kalaallit Nunaannut peqqussummut Namminersorlutik Oqartussat ilanngunnerat pillugu Inatsisartunut aalajangiiffigisassatut siunnersuut

(Aningaasaqarnermut Akileraartarnermullu Naalakkersuisoq)

Saqqummiussissut

Siullermeerinninneq

Matumuuna Naalakkersuisut sinnerlugit aningaasaqarnikkut aalajangersakkanut peqqussut pillugu siunnersuut saqqummiuppara.

Siunnersuummik pingaarnertut siunertaavoq FN-ip aalajangersagaasa Kalaallit Nunaannut atortussanngortinneqarnissai, Kalaallit Nunaanni pissutsit naapertorlugit tulluarsaanertaqartumik. Atortussanngortitsineq aalajangiinikkut pissaaq.

Aalajangersakkat ilaatigut imaraat naalagaaffinnut, peqatigiiffinnut imaluunniit inunnut aningaasaqarnikkut pillaatit, tamatumani nunani tamalaani eqqissineq isumannaatsuunerlu attatiinnarniarlugu.

Kalaallit Nunaannut atortussanngortitsinngitsoorneq Naalagaaffeqatigiit nunat tamat akornanni pisussaffimminnik tamakkiisumik naammassinnissinnaannginnerannik pilersitsisinnaavoq. Kalaallit Nunaata nunarsuarmioqataasutut nunat tamat akornanni pisussaffimmik naammassinninnissaa Naalakkersuisut pingaartutut isigaat.

Kunngip peqqussutaanut siunertaq tassaavoq.

- Financial Action Task Forcep (FATF) innersuussutaasa 40-t malinneqarnerinik qulakkeerinninneq
- FATF-p atuutsitaanik malinninneq, tassani innersuussutit aningaasanik pinerlunnermeersunik malunnarunnaarsaasarnermik pinerlunniaqatigiinnillu aningaasalersuinerimik akiuunnissamut tunngasut ilanngullugit
- Naalagaaffiit peqatigiit aalajangersagaannik, FATF-p innersuussutaanut 6-mut 7-mullu ilaatinneqartunik atuutilersitsineq. Innersuussutit taakku nunat Naalagaaffiit Peqatigiit pinerlunniaqatigiit aningaasalersorneqarnerannik sakkussianillu annertuumik aseruisinnaasunik siaruarternermut aningaasaqarnikkut pillaanerisa ingerlanneqarnissaannut nunat pisinnaanernut attuumassuteqarput.

FATF-p naalagaaffiit aningaasanik peqquserluutinik malunnarunnaarsaasarnermut pinerlunniaqatigiinnillu aningaasalersuinnermut akiuunnermut pisussaaffiinnik nunat tamat akornanni pisussaaffiinnik piviusunngortitsinerat alaatsinaataraa. Naalagaaffiit Peqatigiit Isumannaallisaanermut ataatsimiititaliaata aalajangersagaasa attuumassuteqartut Kalaallit Nunaannut atortussanngortinneqarnerisigut, Naalagaaffeqatigiit nunat tamat akornanni aningaasanik peqquserluutinik malunnarunnaarsaasarnermut pinerlunniaqatigiinnillu aningaasalersuinnermut kiisalu sakkussiat annertuumik aseruisinnaasut siaruarterneqarnerannut akiuunnermut pisussaaffimminnik naammassinninnerat qulakkeerneqassaaq. Aalajangersakkat ilaannikkut imaraat aningaasanik tiguneqarsinnaajunnaarsitsinerit, aningaasatigut isumalluutinik atugassanngortitsinerat inerteqqutit, aningaasanik nuussinernik inerteqqutit, sillimmasiinissamut aamma aningaaserivinni suliaqarnermut kiisalu avammut niuernerat killilersuutit. Inuit kikkut immikkoortullu suut peqqussummi inerteqqutinut ilaatinneqarnerat takuniaraanni Naalagaaffiit Peqatigiit pillaaqatut allattuiffiannut innersuussisoqarpoq. Aningaaserinnermik suliffeqarfiit malinninnerannik nakkutilliivoq Finanstilsynet kiisalu malinninnginnermi peqqussusiisinnaalluni.

Naalakkersuisut sinnerlugit siunnersuut una Inatsisartunut aalajangiiffigisassatut saqqummiutissavara.

Taama oqaaseqarlunga aalajangiiffigisassatut Inatsisartunut kajumittumik suliarineqartussanngortippara.